


778
30/10/2005

মহাসভা লিখাতর ক্ষেত্ৰতামে



দিল্লী লক্ষ্মীন্দ্র সিংহ



মহাসভা লিখাতর ক্ষেত্ৰতামে
দিল্‌স্‌ লক্ষ্মীল্ল সিংহ

সরারেল প্রকাশনী

Mahasabha Lingkhatar Kheltame:

A collection of Essays in Bishnupriya Manipuri Language by
Dils Lakshmindra Sinha and published by Smt. Anita Sinha on behalf
of the Sararel Prakashani, Guwahati.

© Copy right reserved by : Anita Sinha.

পয়লা শাতনি : মহাসভা দিবস,
২৫ সেপ্টেম্বর ২০০৫ ইং।

ডি.টি.পি. বারো মলাট য়েক্করানিত :
অনিতা সিংহ

শাংকরানিত : সৱাৱেল প্ৰকাশনী
ৱেহাবাড়ি, গুৱাহাটী।

দাম : তাংখা দশহান।

লেখকর আকৃষ্টি

১৯৭৩ সালে মি যেবাকা গুরাহাটিত লেরিক তামকরাত বুলিয়া আইলু উবাকা মি দিনে যেসাদেউ সময় নিকালেয়া জিলা গ্রহাগারে আকপাক অইলেউ পাকরানির কোঠাগত গিয়া মণিপূরী (বিকুপ্রিয়া) সম্পর্কিত ইতিহাস বিষয়ক লেরিক পাকরানির অভ্যাস আহান করেসিলু। প্রায় বামা'য়া পাকরানিহান বুলানি যাকরের। এহানর কারণহান আমারে মৈতেয়ে দিনে রাতিয়ে মণিপূরী নাগৈ, বা নকলি মণিপূরী বুলতারা ঔ কাছিহানে। ঔতার গজে ড. কালীপ্রসাদ সিংহর কতহান গবেষণামূলক লেখায় মোরে বিষয় এহানাত আসুলিয়া নেসিলগা। পিছেদে পেইলু ধ্বজরাজ পণ্ডিতর বারো খুমল মহীদেব সিংহর গবেষণা মূলক লেখা যেতাই মোরে আরাকৌ বামাহান বরা দেসিল।

মহাসভা হঙনির কাল উহানর তথ্যাবলী মি পয়লা গুরাহাটির 'যোগেন্দ্র লাল সিংহ গিরকরাংত পাকরেসিলু। উবাকা মি কবিতা ইকরানি না অকরেসিলু। অর্থাৎ ১৯৮০ ইং-র মাপাগ অইতৈ। যেবাকা কবিতা ইকরানি অকরলু উপেইত ইতিহাস চর্চার বামাহান কমনি অকরল। মনে অইল ইতিহাসে মানুরে উগ্র বারো রক্ষণশীল করিয়া তুলের। উতার গজেও অনেক গিরীগিথানী এ ক্ষেত্র এহানাং আয়া ক্ষেতিত লামলা থাংতে মোর আরতা প্রয়োজন নেই নিং করিয়া মি হাবিতা মচা বাদিয়া থসিলু। এহানতে হায়হান ইতিহাস চর্চা এহানে মোর সাহিত্য চর্চাত বারো জীবনর নানা ক্ষেত্রে অনেক সহায়তা করেসিল বারো এবাকাউ করে।

এবাকা বিশেষ দায়িত্ব আহান মনে করিয়া সৎকরে বিষয় এহানল থেঙসু। মি ইতিহাসবেত্তাগ নাগৈ, গবেষকগও নাগৈ। মহাসভার জন্ম লগ্নর ঐতিহাসিক প্রেক্ষাপট উহানর গজে অনেক যারি যেতা সভাসমিতিত হনিয়ার ঔতা সঠিক নাগৈ নিংকরলেও ঔতালো মঞ্চ গরম নাকরিয়া চিককরে মানুরে হারপাকা উপকা বুলিয়া যেহানি সঠিক তথ্য খমকরেসু উহানিরে পাঠকর মুণ্ডে পাজালেয়া তুলিয়া ধরানির হরকাং প্রয়াস আহান বর্তমান গ্রন্থ এহান।

“সরারেল” তৃতীয় বারো চতুর্থ বৎসর “মহাসভার বিশ্বসন্মেলন” সংখ্যাত ছদ্মনাঙে মি “মহাসভা লিংখাতর ক্ষেলতামে” প্রবন্ধহান ইকরেসিলু। লেখা এহান মূলে মহাসভার স্মরণিকারকা ইকরেসিলুহান। স্মরণিকাহানাত আরাক ডিগল ইকরা আহান থাইল থাংতে মি এহানরে বারা থেইকরলু। মোর মূল বিষয়হান ‘মহাসভার লিংখাং দিবস’-হান লেপকরানি বারো ঐতিহাসিক প্রেক্ষাপটহান তুলিয়া ধরানি যে বিষয়হানল এ লেখা এহানর আগ পেয়া আর কোন পত্রিকা বা লেরিকে আলোচনা নাসে। মোর লেখাহানর গজে আজিপেয়া বিরূপ মন্তব্য নাহেসে। ঔ লেখাহানরে খানি পরিমার্জিত করিয়া লগে “মহাসভা হঙনির ঐতিহাসিক পটভূমিকা” প্রবন্ধহান যৌকরিয়া এবাকার সংকলন এহানর সিঁজিল করানি অইল। আগ্রহী পাঠক লকেয়ে মতামত জানেইলে মি উপকৃত অইতৌ।

মারূপ সুধন্য সিংহয় পয়লা এ বিষয়ে ইকরানিরকা মাতেসিল। মি তারে থাকাং নাজানেয়া নাকরি। সাহিত্যিক দিল্‌স্ দেবজ্যোতি বারো গল্পকার লে. কর্ণেল বিজয় সিংহর মতামত রিদিগল নিংশিং অউরি।

প্রকাশ-চৌরাংপী গর-গিথানক রঞ্জিতারে হেরহান চেয়া কৃতজ্ঞতা জানাউরি।

যে গিরকণ্ঠে দীর্ঘদিন মহাসভার কেরানিহান
ধরিয়া খসিল ও সমাজ-চিত্তক, ইতিহাস বেতা,
'বিশ্বপ্রিয়া'-সম্পাদক
শ্রদ্ধেয় মহেন্দ্ৰ কুমার সিংহ গিরবর
নিঙে নিংশিঙে
লাংকরেসু এ গ্রন্থহান।

মহাসভা লিংখাতর ক্ষেলতামে

সমাজর ঐতিহাসিক দায়িত্ব আহান পালন করানির সালে মহাসভার জরম; বিশেষ পরিস্থিতি আহানর অনিবার্য ফলহান। বিষ্ণুপ্রিয়া মণিপুরীর আধুনিক ইতিহাসর পয়লাকার কাকেইহান মহাসভা হঙনির ক্ষেলতাম উহান। ঔ ক্ষেলতামেস্ত তঙাল জাতিগোষ্ঠী আহান হিসাবে পালয়া থানার রাজনৈতিক লালফামর অকরাগ দেসিল। তারো ঔ পবিত্র ক্ষেলতামরে, মহাসভা হঙনির ঐতিহাসিক প্রক্ষাপটহানরে প্রত্যেকগো বিষ্ণুপ্রিয়া মণিপুরীয়ে হারপানি থকর।

আমার দুর্ভাগ্যহান আমার জাতীয় জীবনর এ ইশেং শেংপা দিন এহানর সন্দর্ভে আমারাং কোন স্পষ্ট ধারণা নেই। এহানর কারণহান অইলতায় মহাসভার নির্দিষ্ট অফিস ঘর আগ নাথানিয়ে রেকর্ড কিতা হাবিতা আকপেইত ইতু করিয়া যত্নল থনা নাসে। ঔতার গজে প্রাকৃতিক নানা দুর্যোগ—বৌ-বরণ, গুলা, ছি-পানিয়ে অনেকতা গুরুত্বপূর্ণ রেকর্ড মাঙইল। অনেকে যেতা পাসি ঔতা দুবাদে না নিকালেয়া থইতারা। উতার খেইপক আহান সুমে খেয়া মাঙর। যেহানি জিংতা অয়া থার ঔতান্ত অনেক তথ্য কোনদিন মানুর আহিত পড়ব নিং নাদেহিয়ার। লমইলগা গুরুত্বপূর্ণ কারণহান অইলতাই মহাসভা হঙসে হাকতাকর পত্র-পত্রিকাত নিকুলেসে পৌ কিতাত মহাসভা এনাঙ এহানর উল্লেখ বিশেষ নাথানিয়ে বিভ্রান্তি আহানাত পড়িয়ার। যেতাউ অক এতার হাদিতৌ মণিপুরী, মেখলী, আদি পত্রিকাত নিকুলেসে নানান রিপোর্ট বার মহাসভার কতহান প্রকাশিত প্রস্তাবাবলীর ভিত্তিত মহাসভা হঙনির প্রক্ষাপটহান আলোচনা করানি বারো লিংখাতর দিনহান লেপ করানি অইতৈ।

ব্রিটিশ সরকারে ভারতর যত জাত এতারে উন্নত, অনুন্নত,) অবনত (ট্রাইবেল) এসাদে নানান থাকে খেইকরিয়া অবনত বার অনুন্নত এ জাত এতারে (অর্থাৎ S.C., S.T. O.B.C.রে) মিমাঙে অনানির কাকেই কারেসিল। ঔহানরে ইলয়া আসাম ফ্রেনচাইজ কমিটিয়ে ১৯৩২ ইংরেজীর ২১শে মার্চ জরুরী নোটিশ জারী করিয়া মণিপুরীয়ে অশিক্ষিত পার্বত্য জাতির (অর্থাৎ S.T.র) অন্তর্ভুক্তি করেদেসিল। ঔহান দেহিয়া মাছুঘাটর মাণিকচান্দ সিংহ, শিলচর ঝালুপারার খেলেন্দ্র সিংহ, রামনগরর চৌধুরী সিংহ গিরক তিনগই বিষয় এহানল যারি-পরি দেনারকা বিষ্ণুপ্রিয়া বার মৈতৈ দ্বয় দাপারে তিলকরিয়া অধিবেশন আহান ডাহেসিলা। ১৯৩২ ইংরেজীর ১২জুন ১বাজিত তারাপুরর খেলেন্দ্রে চন্দ্র মুখোপাধ্যায় (গণঠাকুর) গিরকর মালঠেপে বহেসিলা ঔ বিশেষ অধিবেশন ঔহান। ঐতিহাসিক সভা উহানাত যবদেসিলা দৌলাশা গিরকলকেইরমা পেয়ার নীলেন্দ্র মুখোপাধ্যায়, বিজয় সিংহ, লক্ষ্মীন্দ্র কুমার সিংহ, চন্দ্রবাবু সিংহ, লোকেন্দ্রজিৎ রাজকুমার, জগদানন্দ সিংহ, কুঞ্জরাজ সিংহ ব্যাকরণতীর্থ, বিনোদ বিহারী সিংহ, নরেন্দ্র সিংহ, কালচান্দ সিংহ, গিরীশ চন্দ্র সিংহ, চাউরেল সিংহ, কৃত সিংহ, ডঃ কৃষ্ণপ্রসাদ সিংহ, মহেন্দ্র কুমার সিংহ রাজকুমার, নেত্র সিংহ, তালোক সিংহ, রাজেন্দ্র সিংহ, যোগেন্দ্র সিংহ, রাজবাবু সিংহ প্রমুখরে।

সভাহানাত মানু মণিপুরী নিয়ম ইলয়া বহেসিলা। বামুনর ফালুহান পশ্চিমে, রাজার জিপুত উত্তরে, প্রতিনিধি পূর্বদে বারো সভামাপুগ দক্ষিণে বহানির ব্যবস্থা অসিল। গণঠাকুর

গিরকে তার আসনহানাত বয়াই সভা অকরানির আগে মৈতৈর প্রাধান্যহান দেখ্বানিরকা মাতেসিল-
-“ঙসিগি সভা অসি মৈতৈগী সভানি। ময়াং অমন্তসু যাওদে”। অর্থাৎ এহান মৈতৈর সভাহান।
মিয়াং আকগউ নেই। তারো সভাত মৈতেয় ঠারল টটরানি অক। বারো মণিপুরী নিয়ম ইলয়া গারে
ফুতি বেলেয়া ভক্তিল টটরানি অক। আরাকৌ কতর কথা। সভাহান দশ মিনিট জুম মারেসিল। খানি
থায়া বিষ্ণুপ্রিয়া গিরক আগই গণাঠাকুরর কথাহান কাপিয়া মাতেসিল -“অদ্যকার সভা সুরমা উপত্যকার
মণিপুরীদের সভা, ইহা কোন মৈতৈয়দের সভা নয়। এই সভায় বিষ্ণুপ্রিয়ার সংখ্যাই বেশী আছে।”
গিরকে আরাকৌ মাতেসে অনেক বিষ্ণুপ্রিয়ায় মৈতৈ টটরানি নুৱারতারা, হারউ নাপেইতারা তারো
সভাত মৈতৈ বারো বাংলা দ্বিয় ঠারউ চলক। বারো এহান কোন অপরাধীর বিচারর সভাহান নাইগে
হাস্তে গারে ফুতি লামকরিয়া আতজোড় করিয়া বক্তায় টটরানির প্রয়োজন নেই। ব্রিটিশর প্রজা
হিসাবে তানুর নিয়ম ইলয়া সভার কাম চলক। গিরকর নাঙহান রিপোর্টে প্রকাশ নানাই আমারাং
অজ্ঞাত থা গেলগা। গিরকর যুক্তিত গণাঠাকুর হার মানেসিল। অভ্যর্থনা কমিটির সভাপতি
হেমচন্দ্রজিৎ রাজকুমার গিরকে সংস্কৃত শ্লোক আহান অরানির পিসেদে সভার কাম অকরানি
অসিল। ঔ সভাত সভামাপুগ অসিলতাই খেলেন্দ্র সিংহ গিরক।

নানান বক্তায় অর্জুনর বংশধর হিসাবে মণিপুরীরা আৰ্য্য বুলিয়া লেপকরিয়া
ট্রাইবেলে বরানির বিষয় এহানরে প্রতিবাদ জানাসিলা। ঔদিনকার সভাত মণিপুরীর উৎপত্তির বিষয়হানল
নানান ঐতিহাসিক তথ্য তুলিয়া ধরিয়া হাবিস্ত আকর্ষণীয় বক্তব্যহান খসিলতাই ইতিহাসবেত্তা
মহেন্দ্র কুমার সিংহ গিরকে। মণিপুরী পত্রিকার (প্রথম বর্ষ, প্রথম সংখ্যা, ১৯৩৩ইং) রিপোর্টে
মাতেসি-“তাহার বক্তৃতায় মণিপুরী জাতির চোখমুখ ফুটিয়াছে পরিষ্কার বলা যায়।” ঔদিনকার
সভার অনেকহান প্রস্তাব বিষ্ণুপ্রিয়া মণিপুরীর আধুনিক ইতিহাসর দিক নির্ণয় করের। তারো প্রস্তাব
উহানির ঐতিহাসিক গুরুত্ব বিবেচনা করিয়া কতহান আকতা থাংনাত তুলে দিয়োরি :

(এক) আসামের অন্যান্য জাতির সঙ্গে সুরমা উপত্যকার মণিপুরীদিগের আসামলে কাউন্সিলে
স্থান সংরক্ষণের জন্য গবর্ণমেন্ট যে সব উপায় অবলম্বন করিতেছেন তজ্জন্য এই সভা গবর্ণমেন্টকে
আন্তরিক ধন্যবাদ জানাইতেছেন।

প্রস্তাবক : শ্রী রাজেন্দ্র সিংহ, ঝালুপারা, শিলচর সমর্থক : শ্রী বিজয় সিংহ।

(দুই) এই সভা উপত্যকার সরপঞ্চদিগের নিকট প্রেরিত গবর্ণমেন্টের নোটিশে
মণিপুরীদিগকে পার্বত্যজাতির অন্তর্ভুক্ত করার জন্য জোর গলায় প্রতিবাদ জানাতে চান।

প্র : শ্রী চৌধুরী সিংহ, সরপঞ্চ, রামনগর স : শ্রী কুঞ্জরাজ সিংহ, ব্যাকরণরত্ন, মাছুঘাট।

(তিন) এই সভা, আসাম গেজেটিয়ারে মণিপুরীদিগকে কুকী-চীন দলে ফেলিয়াছেন
তজ্জন্য জোর গলায় প্রতিবাদ জানাইতেছেন।

প্র : শ্রী রাজবাবু সিংহ, স : শ্রী বিজয় সিংহ।

(চারি) মণিপুরীরা আৰ্য্য জাতি, ইহা প্রমাণ করিয়া গবর্ণমেন্টের নিকট একখানা পত্র দেওয়া
হউক এবং তাহাতে উল্লেখ করা হউক যে, :-

(ক) ইতিহাস ও পুরাণাদি সহ সুরমা উপত্যকার মণিপুরীদিগকে তাহাদের আৰ্য্যত্ব প্রমাণের
সুবিধা দেওয়া হউক।

(খ) মণিপুরীদিগকে পার্বত্য জাতির অন্তর্ভুক্তি করার ভুল ও অসত্য শ্রেণী বিভাগ সংশোধন ক্রমে মণিপুরীরা আর্য বলিয়া যে দাবী করিতেছে তাহা গ্রহণ করা হউক।

(গ) মণিপুরীদিগকে তাহাদের নিজস্ব ভাষা ও রীতি নীতি থাকা হেতু হিন্দুর অন্তর্ভুক্ত ক্ষত্রিয় (মণিপুরী) শাখা বলিয়া গণ্য করা হউক এবং তৎসঙ্গে আসাম কাউন্সিলে পৃথক মেম্বার দেওয়া হউক এবং ইংরেজী শিক্ষায় অনুন্নত হওয়ার দরুণ উচ্চ নীচ সব রকমের চাকুরী দেওয়া হউক।

প্র : শ্রী চন্দ্রবাবু স্বতীতীর্থ

স : শ্রী ফাঙ্কুণী সিংহ।

(পঞ্চম) এই সভা ইম্ফল, কুসুম কুটীর, বেদভবন ইহাতে প্রকাশিত পণ্ডিত আত্মপু বিদ্যারত্নের “মৈতৈ হরি মৈ” নামক ইতিহাসে মৈতৈদের উৎপত্তি সম্বন্ধীয় কয়েক হাজার আপত্তি জোর গলায় জানাইতেছেন। ইহা মণিপুরী জাতির— মৈতৈ ও বিষ্ণুপ্রিয়া দুইটি মূল শাখার প্রকৃত ইতিহাস বলিয়া গণ্য করা যাইতে পারে না বলিয়া গভর্নমেন্টের দৃষ্টি আকর্ষণ করা হউক।

প্র : শ্রী বিজয় সিংহ

স : শ্রী হেমচন্দ্রজিৎ রাজকুমার বিদ্যানিধি।

ষষ্ঠ প্রস্তাবহান কুঞ্জরাজ সিংহ গিরকে আনেন—“বিষ্ণুপ্রিয়া মণিপুরীরা যদিও মণিপুরী জাতির বড় শাখা এবং তাদের নিজস্ব বিষ্ণুপ্রিয়া ভাষা আছে, তথাপি বিদেশীয় ইতিহাস লেখকেরা এমন কি আত্মপু মহাশয় পর্যন্ত তাঁহার মণিপুরী ইতিহাস বলিয়া লিখিত “মৈতৈ হরি মৈ” নামক ইতিহাসে বিষ্ণুপ্রিয়া শাখার উল্লেখ করেন নাই তজ্জন্য গভর্নমেন্টের দৃষ্টি আকর্ষণ করা হউক।”

প্রস্তাব এহান আনার লগে লগে মৈতৈয়ে তানুর বিতরে আলোচনাত থেঙসিলা। গণাঠাকুরে মাতেসে— “মৈতৈ বিষ্ণুপ্রিয়া হাইবাদি অমন্তনি। খুওয়াইসু মৈতেয়নি। তঙানওয়া হাইবগি মথও লৈতে”। বিষ্ণুপ্রিয়া বার মৈতৈ এতা আকতা। হাবিও মৈতৈ। তঙাল করে (বিষ্ণুপ্রিয়ার কথা) মাতানির প্রয়োজন নেই। গিরকর কথা এহানরে বিষ্ণুপ্রিয়াই প্রতিবাদ করেসি। বিষ্ণুপ্রিয়া গিরক আগই উবায়া মাতেসে - “ মৈতেয় ও বিষ্ণুপ্রিয়া বিজাতীয়দের নিকট এক মণিপুরী বলিয়া পরিচিত কিন্তু মৈতেয় ও বিষ্ণুপ্রিয়া সবই “মৈতেয়” এই কথা সম্পূর্ণ ভুল। কারণ বিষ্ণুপ্রিয়াদের এক নিজস্ব ভাষা আছে এবং তাহা মৈতেয় ভাষা হইতে সম্পূর্ণ পৃথক। আজ পর্যন্ত মৈতেয় ও বিষ্ণুপ্রিয়ার মধ্যে সামাজিক বিবাহাদি চল নাই। এমতাবস্থায় কি প্রকারে মৈতেয় ও বিষ্ণুপ্রিয়া সবই মৈতেয় হইতে পারে।.....” নানান বিতর্কর পিসেদে কমলবাবু বুলিয়া গিরক আগই খানি সংশোধন করে দিলে প্রস্তাব উহান গৃহীত অসিল। সংশোধিত প্রস্তাবহান এসাদে : - “ বিষ্ণুপ্রিয়া মণিপুরীরা মণিপুরী জাতির এক বড় শাখা। তাহাদের বিষয় আজ পর্যন্ত বিদেশীয় ইতিহাস লেখকদের নজরে পড়ে নাই। পণ্ডিত আত্মপু মণিপুয়ের ঐতিহাসিক বৃত্তান্ত বলিয়া পরিচিত “মৈতৈ হরি মৈ” বিবরণেও এই শাখার উল্লেখ করেন নাই ; তজ্জন্য গভর্নমেন্টের দৃষ্টি আকর্ষণ করা হউক।”

গজর সংশোধিত প্রস্তাব এহান চেইলে হারপানি য়াকরের মৈতেয়ে হাবিতা য়াকরলেও “বিষ্ণুপ্রিয়াদের নিজস্ব বিষ্ণুপ্রিয়া ভাষা আছে” এহানতে তানু বিরোধীতা করেসি। কারণ তানু উবাকাই হারপাসি ভাষাহান নেইলে তঙাল জাত আহান বুলিয়া বিষ্ণুপ্রিয়ায় য়ামদিন থা’ নুবারতাই। মণিপুরর সাদে তানুর অস্তিত্ব লিম মাওয়া যিতৈগা।

সপ্তম প্রস্তাবে মণিপুরীর আর্যত্ব প্রমানরকা প্রায়াজনীয় নথিপত্রল আসামর লাটবাহাদুরর তুল মোকাবিলা করিয়া আহানিরকা চারিগ প্রতিনিধি লেপকরে দেসিলা। তানুরমা (১) মহেন্দ্র কুমার সিংহ

বি.এ., বি.টি. (২) রমন সিংহ, বি.এ., বি.টি. (৩) হেমচন্দ্রজিৎ রাজকুমার, বিদ্যানিধি (৪) বিজয় সিংহ, মাছুঘাট।

সর্বসম্মতিল গৃহীত প্রস্তাব উহানি সভার সভাপতি খেলেন্দ্রে সিংহ গিরকে সরকাররাং দিয়াপেঠাত পোস্টাপিসে যিতেগা রামনগরর চৌধুরী সিংহ গিরকে তারে পথে পেয়া উহান আসল দেসিল। উতার আগে পণ্ডিত আতম্বাপু শর্মায় বিষ্ণুপ্রিয়া ইতিহাস অধীকার করিয়া মৈতৈরাং চিঠি ইকরানিয়ে ঔহানল তানুর বিতরে লয়া লয়াত মিটিং চলেসিল। চৌধুরী গিরকে ১২ জুনর প্রস্তাবাবলী উতা বিজয় সিংহ গিরকরাং দিয়া পেঠাদেসে ঔগদে ঔতা লিম মাঙকরানি অইল। ১৩সেপ্টেম্বর ৩২ ইং পেয়া সিদ্ধান্তর প্রতিলিপি সরকাররাং দিয়াপেঠানি নাইল। মৈতৈ কতগর চক্রান্ত এহান দেহিয়া বিষ্ণুপ্রিয়া মণিপুরীয়ে তঙাল অয়া ২৫সেপ্টেম্বর (১৯৩২)ইং রবিবার বেলুকা ১বাজিত অধিকাপুরে জগদানন্দ সিংহর ঘরে অধিবেশন আহান ডাহেসিলা। অভ্যর্থনাব ভারহান লসিলাতাই গিরীশচন্দ্র সিংহ, জগদানন্দ সিংহ বেদান্তরত্ন বার মাছুঘাটর মাণিক সিংহ গিরকসাগিয়ে। হেমচন্দ্রজিৎ রাজকুমার গিরকর সভাপতিত্বং অনুষ্ঠিত অসে এ ঐতিহাসিক অধিবেশনে পুলসিলা দৌলাশা ঙ্গীজ্ঞানী গিরক লকেইরমা পেয়ার মহেন্দ্র কুমার সিংহ (ভজন্তিপুর), শ্যামানন্দ রাজকুমার (দুধপুর), কৃষ্ণচন্দ্র সিংহ রাজকুমার (আলগাপুর), ধন সিংহ, বাচস্পতি (নরসিংপুর), কীর্তি সিংহ (কাটাখাল), লক্ষ্মীন্দ্র কুমার সিংহ (মাছিমপুর), কমলাকান্ত সিংহ, কাব্যরত্ন (নরসিংপুর), ধনজিৎ রাজকুমার (হাতীরত্নাড়), কুঞ্জরাজ সিংহ, ব্যাকরণরত্ন (মাছুঘাট), কালাচাঁদ সিংহ (লালা), গোকুলচাঁদ সিংহ (সুদর্শনপুর), সেনা সিংহ (নিত্যানন্দপুর), উপেন্দ্র সিংহ (ঔ), চুড়া সিংহ (কচুদরম), গোলাপ সিংহ (কাটাখাল), ফাল্গুনী সিংহ (ঔ) খাস্বা সিংহ (দুধপাতিল), সুরেন্দ্র সিংহ (মাছুঘাট), মুহি সিংহ (ঔ), রাজবাবু সিংহ (ঔ), তঞ্জাউ সিংহ (ভকতপুর), রাজবাবু সিংহ (ঔ) প্রমুখ। ব্রিটিশ সরকারে ভারতর অনুল্লত বার অবনত শ্রেণীর মানুর উন্নতির সালে তঙাল সুবিধা দেনার ব্যবস্থা থনায় সভায় পক্ষত সরকারে থাকাং জানাসিলা। লগে সরকারর “স্বতন্ত্র নির্বাচন নীতি”র সমর্থন জানেয়া মণিপুরীয়ে অনুল্লত জাতির অন্তর্ভুক্ত করিয়া তানুরকা পদ সংরক্ষণর দাবীও জানাসি। গৃহীত প্রস্তাবাবলীর ৩নং প্রস্তাব পাকরলে হারপেয়ার যদিও ১২ জুনর (৩২ইং) সিদ্ধান্তাবলী সরকাররাং না দিয়াপেঠানিরকা মৈতৈয়ে চক্রান্ত চালেইলেও ঔ অধিবেশনর অভ্যর্থনার সভাপতিগ হিসাবে শ্রদ্ধেয় হেমচন্দ্রজিৎ রাজকুমার গিরকে সিদ্ধান্ত ঔতা নিজেস্ত দিয়াপেঠাদেসিল। আসাম সরকারেও নিয়ম ইলয়া ভারতর সেনশাস কমিশনাররাং ফৌকরে দেসিল। সভায় এহানরকা আসাম সরকারে ধন্যবাদ জানাসি। আরাক প্রস্তাব আহানল ১২জুনর সভার সভাপতি খেলেন্দ্র গিরকে তার উপযুক্ত কর্তব্য নাকরানির প্রতিবাদ জানাসিলা।

গজর আলোচনা এহান মণিপুরীর ১ম বার ২য় সংখ্যায় রিপোর্ট ইলয়া যথাক্রমে (১৩০৪বাং) ভাদ্র বার আশ্বিন মাহা তুলিয়া ধরানি অইল। এ রিপোর্ট এতাং উল্লেখ আসেতাই “সুরমা উপত্যকার মণিপুরীদের সম্মেলনী”। মহাসভার নাঙে কোন প্রস্তাব গৃহীত অসে বুলিয়াও রিপোর্ট নাহেসে। পত্রিকাহানর ৩য় সংখ্যাত “প্রতাপগড়ের সভাসমিতি” রিপোর্টে অবশ্য উল্লেখ আসে— “এবাকার প্রতাপগড় মহাসভায়..... স্থিরকৃত প্রতাপগড়, সিংলা, ভানুগাছ, কৈলাশহর ও কাছাড় জেলার প্রতিনিধিরা সকলেই উপস্থিত ছিলেন। সভা এহান মূলতঃ রাধাকুণ্ডর শ্রী শ্রী রাধানাথবজীউর কুন্ডর কামাদার

নিযুক্তির বিষয়ে আলোচনারকা ডাহানি অসে। এহানাত মন্দির পরিচালনার দায়িত্বহান কমিটি আহানরাং দেসি— সভাপতি তনুবাণু সিংহ (Retd. Excise Supdt.)। সভায় হেমচন্দ্রজিৎ রাজকুমার, কীর্তি সিংহ উকিল গিরক দ্বিয়গিরে সমিতির নিয়মাবলী হঙকরানির ভার দেসি।

সভা এহান ২রা অক্টোবরে পাথারকান্দি গাঙে অসেহান। কিন্তুমান এহানর বসরহান উল্লেখ নেই। মণিপুরী পত্রিকার ১৯৩৩ ইং কার্তিক (১৩৪০বাং) ৩য় সংখ্যাং রিপোর্ট এহান নিকুলেনিল। সভা ১৯৩৩ ইং, ২ অক্টোবর আইতেও পারে। কারণ ৩০সেপ্টেম্বর বার ১লা অক্টোবর, ১৯৩৩ইং পাথারকান্দি মহাসভার অধিবেশন আহান বহেসে।

যেতাও অক ১৯৩৩ ইং, ৩০সেপ্টেম্বর বার ১লা অক্টোবরে পাথারকান্দি মহাসভার দ্বিদিনকার সম্মেলন বহেসিল। ঔহানরে রিপোর্টে “বিরাট সম্মেলনী” বুলেসি। এহানাং সভাপতিত্ব করেসিল হেমচন্দ্রজিৎ রাজকুমার বিদ্যানিধি গিরকে। সভায় মণিপুরীতে “উচ্চ হিন্দু শ্রেণী”র অন্তর্ভুক্ত করানিয়ে সরকারেরে থাকাং জানাসি। এহান মহাসভার ২য় অধিবেশনহান। অনেকে ভকতপুরে শ্রদ্ধেয় কুন্জেশ্বর সিংহ গিরকর গরে কাছাড়র ডেপুটি কমিশনার বাকার সাহেবর তুলো অসিল সভাহানরে ২য় অধিবেশন বুলতারা। কিন্তুমান ঔদিকার সভা ঔহান অধিবেশনহান নাগৈ “সুরমাভালী মণিপুরী এসোসিয়েশন”র ঠৌরাঙে বাকার সাহেবরে দেসি “সম্বর্ধনা” সভাহান। সভাং শ্রদ্ধেয় ইতিহাসবেত্তা মহেন্দ্র কুমার গিরকে তার বিখ্যাত এলাহান “আরতা কারে ডেরেইতাং/সরকার আমার মীচাং” লুয়াসিল।

হুদা মণিপুরী পত্রিকাত নাগৈ, মেখলী, ক্ষত্রিয়জ্যোতি, নুয়াবেলী ইত্যাদি পুরানা পত্রিকার রিপোর্টেও “নিখিল বিষ্ণুপ্রিয়া মণিপুরী মহাসভা” নাঙ এহান নাও পেয়ার। অনেকে তারো মাতানি মনেইতারা মহাসভার নাঙহার “বিরাট সভা”, “ক্ষত্রিয় সম্মিলনী” এসাদে আসিল। কিন্তুমান ঔ নাঙ ঔতা প্রচারে থাইলেও তার লিখিত নাঙহান “মহাসভা” অন্যর সম্ভাবনা য়াম। কিয়া বুঙ্গে ১৯৩৩ইং ডিসেম্বর মাহাত তিনদিনর “বিরাট সম্মিলনী” আহানাং “নিখিল হিন্দু মণিপুরী মহাসভা” নাঙর সংগঠন আহান, বিষ্ণুপ্রিয়া বার মৈতৈ দ্বিয়তার হাদিত সম্বর্ধয় সাধনরকা (নিঃ বিঃ মঃ মহাসভার অনুকরনে) লিংখাং অসে।

১৯৬১ইং শিংলার অধিবেশনে পয়লা “মহাসভার গঠনতন্ত্র” আহান প্রাথমিক পর্যায়ে প্রস্তাবাকারে গৃহীত অসে। ঔহানর ১ম প্রস্তাব (১) মতে— সমিতির নাঙ — “নিখিল পঞ্চ বিষ্ণুপ্রিয়া মহাসভা”। ১৯৬৩ইং বিক্রমপুর অধিবেশনর ছাপিয়া নিকুলেনিল প্রস্তাবাবলীতৌ ইকরা আসে গজর নাঙ এহান। “নিখিল বিষ্ণুপ্রিয়া মণিপুরী মহাসভা” নাঙ এহান ১৯৬৫ সালে সরকারী পঞ্জীকরণ করানির সময়ত [Regd. No.82/65-66] লেপকরেসিহান। ঔতার পিনেকার কার্যবিবরণীরমা এ নাঙ এহানেই ইকরতে দেহিয়ার।

মহাসভার ‘লিংখাত দিবস’ এহান স্পষ্ট অরতা তিনখাল অধিবেশনর (১৯৬৯ইং ২৪ বারো ২৫ জানুয়ারী) প্রকাশিত প্রস্তাবাবলীর বেদে আহি বুলন দিলে। অধিবেশনর ৪র্থ প্রস্তাবর (খ)র(২)য়ে ইকরেসি — তলে ইকরা অতীতর প্রমাণ্য এহানি ভারত বার ত্রিপুরা সরকারেরে ত্বরাকরে প্রসঙ্গ হারপানির সালে দিয়াপেঠানি অক।

(ক) তারাপুরে মৈতৈ বিষ্ণুপ্রিয়া, ২২ জুন, ১৯৩২ ইং।

(খ) অম্বিকাপুরের মণিপুরী মহাসভা (মহাসভার ১ম অধিবেশনহান ২৫ সেপ্টেম্বর, ১৯৩২ইং)।
 (গ) মহাসভার পাথারকান্দির অধিবেশন (৩০শে সেপ্টেম্বর বার ১লা অক্টোবর, ১৯৩৩ইং)।
 “দি মহাসভা রিভিউ” (১৯৭০) Chap III The Emergence of the Biratsabha or Mahasabha’র আলোচনাত হারপেয়ার ১৯৩২ ইং ২৫সেপ্টেম্বরে হঙসে সুরমাভ্যালী মণিপুরী এসোসিয়েশন। ৩০ সেপ্টেম্বর বাঙা ১ অক্টোবর ১৯৩৩ ইং পাথারকান্দির গণ কনভেনশনে হঙসে মহাসভা—“Vide Res No. 1 The convention, as the Meiteis did not embrace it, came to be known as “Nikhil Bishnupriya Manipuri Mahasabha or Biratsabha” এ আলোচনা ইলইলে মাতানি যাকরের মহাসভার জরম ৩০ সেপ্টেম্বর ১৯৩৩ইং পাথারকান্দির আসিলতা দাদ। এহানর পয়লাকার সভাপতিগ হেমচন্দ্রজিৎ রাজকুমার গিরক।

গজর আলোচনা এতাত হারপানি যাকরের পয়লা সমগ্র মণিপুরীর জাতীয় সংগঠনহান বুলিয়া ২৫ সেপ্টেম্বর ১৯৩২ ইং (১৯৩২ ইং) “সুরমা ভ্যালী মণিপুরী এসোসিয়েসন” হুজুয়া ১৯৩৩ ইং সনে সরকারী পঞ্জীকরণে হনোয়া ১৯৪১ সাল পেয়া মহাসভার তুল সমাজ্জাল ভাবে কাম করগেসিলগা। তেবও জাতীয় স্বার্থ মুঙহনাত দিয়া বিষ্ণুপ্রিয়া মণিপুরী জাতিগোষ্ঠী এহানরে তঙালকরে প্রতিষ্ঠা করানিরকা, পিসেদে নিখিল বিষ্ণুপ্রিয়া মণিপুরী মহাসভাত মিশিয়া গেলগা। তারো এসোসিয়েশনের লিংখাং দিবস উহানরে মহাসভার লিংখাং দিবস ধরলে আমি লাল নাইতাঙাই। মহাসভার তিনখাল অধিবেশনের প্রস্তাববিলীয়ে উহানর সমর্থন জানার। মহাসভার মহান লিংখাত দিবস ২৫সেপ্টেম্বর এহান শ্রদ্ধাল লিংখিং অনা আমি প্রত্যেকগর কর্তব্যহান।

অনেকে মৈতৈ বার বিষ্ণুপ্রিয়া দরবার এহানরকা বিষ্ণুপ্রিয়ারে বিশেষভাবে মহেজ্রাবুরেদারী করানি মনেইতারা। কিন্তুমান গজর আলোচনা উহানাত এহানও সা সা করে ধরা পড়ের যে আতম্বাপু গর্মা, গণাঠাকুরর সাদে কতগ অপরিণামদর্শী মানু কতগ এ বিরোধ এহানরকা দারী। ঔদিনকার ঐতিহাসিক ঘটনা ঔতাই বিষ্ণুপ্রিয়ার আহি মেলে দিল। বিষ্ণুপ্রিয়াই মাঙে বাধ্য অইলা— বিষ্ণুপ্রিয়া মণিপুরীরা মণিপুরী জাতির প্রধান দুই শাখার এক শাখা। বিষ্ণুপ্রিয়াদের সংস্কৃত হইতে উৎপন্ন নিজস্ব এক ভাষা আছে। তাহারাই মণিপুরের আদিম অধিবাসী।” যেতাও অক, ঔদিনকার জাতীয় চেতনাই ঐতিহাসিক কারণে লিংখাং অসে মহাসভা। এ মহাসভার ফিরালর তলে উবায়া আপাবপায় নানান য়েক্লা-লৌনামর মোকাবিলা করেসি। আজিও করিয়ার। আজি আমি ভাষা-সংস্কৃতি বিকাশর মাধ্যমে সম্পূর্ণ জাত অয়া পালয়া থানার হন্না করিয়ার, সংগ্রাম করিয়ার। এ সংগ্রাম এহানর পথ নির্দেশ করে দেসে মহাসভাই। অনেক ক্ষেত্রে ব্যর্থতা থাইলেউ সফলতা সুপ নেই উহান মাতে নুবারিয়ার। গর্থতা উতা কি কি কারণে উহানিও আত্ম-সমালোচনার মাধ্যমে বিশ্লেষণ করানি থকৈতে। উহান অইলে নিজরে চুমকরানি পারতাঙাই। বারো ‘মহাসভা’ ‘মহাসভা’ বুলিয়া লাখলে চিকারি দিলেও নাইতৈ, এবাকার আর্থ-সামাজিক(রাজনীতি-সাপেক্ষ) নুবা নুবা চ্যালেঞ্জ এতারে মোকাবিলা করে নারলে, উদার মানবিক দৃষ্টিভঙ্গীল নাচললে মহাসভা সাধারণ মানুড়াও অপ্রাসংগিক অইতৈ।

মহাসভা লিংখাতর ক্ষেত্রে লিটিঙে আসিলা ঔ দৌলাশা গিরিগিথানীরে আজিকার দিনে শ্রদ্ধাভক্তি কাংকরিয়ার। তানুরে আমার সংগ্রামী অভিনন্দন জানেয়ার। ১০

মহাসভা হঙনির ঐতিহাসিক পটভূমিকা


নিখিল বিষ্ণুপ্রিয়া মণিপুরী মহাসভা, যেহানরে ইজুকরে মহাসভা বুলিয়ার, বিষ্ণুপ্রিয়া মণিপুরীর হাবিস্ত পুরানা বারো ডাঙর সংগঠনহান। হঙসে দিনেস্তু আজিপেয়া সমাজরে সামাজিক, সাংস্কৃতিক, বারো রাজনৈতিক দিকেদে নানান আয় আপদেস্তু কালকরানি লগে নুৰা পথে ইলকরানির ওরু দায়িত্ব পালন করিয়া আহের। ইতিহাসর নির্মম ইশারাত, মৈতে বারো অরার ধারার করাল হতগত কৌহাঙর সাদে বাহিতে বাহিতে লৰা ডেঙা দিয়া সিতারেয়া পরেসি বিষ্ণুপ্রিয়া, - আসাম, ত্রিপুরা, বাংলাদেশ বারো ব্রহ্মদেশর লয়ার লয়ায়। কুম্পেইত কুংগ সিলসি ঔতার ঠিক নেই। এতাহাবিরে আকপেই পুলকরানি কম কথাহান নাগৈ। ঔতাও ঔ যুগে যেবাকা যোগাযোগর বিশেষ সুবিধা কিত্তাও নেয়সিল। টেঙারা চিংচৌ বাগিয়া, শত শত মাইল জিরন নেই আটিয়া, চিড়া মুড়ি কাকালিত বাদিয়া অসাধ্য সাধন করেসি আপা বপায় সমাজরে কালকরানির রামাল। আমার সাদে কতর হুৰু হারকাং জনগোষ্ঠী বাঙালী, অসমীয়া বারো মৈতেইর হাদিত লিম মাঙয়া গেলাগা ঔতার সীমা সংখ্যা নেই। “জাগরণ” পত্রিকা পাকরলে হার পেয়ার বিষ্ণুপ্রিয়া এতারমাও অনেকে বাঙালী নাইলে মৈতেই অনার পথে সালসিলা। এরে সালনির পথগ থেংকরিয়া জরম অসিল মহাসভা। মণিপুরর মৈরাঙ, লুৰাঙ, খুমল, আঙম, মাঙাঙ হাবি মৈতেই অলৈলা, পারিপার্শ্বিক অবস্থার বিশেষত মৈতেইর চাপে। বর্হিমণিপুরর বিষ্ণুপ্রিয়া মণিপুরীরে আকপেইত যমকরিয়া, মহাসভাই থনা পারল। পারল আরো আজি আমার নিজর ভাষা বারো কৃষ্টিত তঙাল জাতিগোষ্ঠী আহান বুলিয়া পালয়া থানার হন্না করিয়ার। জাত আহানর মূলহান বা ভিত্তিগ তার ঠার উহান। উহানল পৃথিবীর অধিকাংশ জনগোষ্ঠীর বা জাতর পরিচয় তানুর ঠার উহানল। ইউরোপর ইংলিশ, জার্মান, ফরাসী বারো এশিয়ার চীনা, জাপানি কিতা, ভারতর তামিল, তেলেগু, অসমীয়া, নেপালী, মণিপুরী ইত্যাদির পরিকর তানুর নিজর নিজর ভাষা উতা। ভাষাহানরে কেন্দ্র করিয়া বাংলাদেশর জরম। এসাদে ভারতবর্ষ এগর রাজ্য এতাউ হঙসেতা ভাষার ভিত্তিল। দুহান আহান ক্ষেত্রে যদিও এতার ব্যতিক্রম আসে। মহাসভা এহানৌ জরম অসেতা ভাষাহানর পরিচয়ল। ১৯৩২ সালর ১২ই জুন তারাপুরর সভাত যেবাকা মৈতেই বামুন গণাঠাকুরে মাংল - মৈতেই মানে মণিপুরী, মণিপুরী মানে মৈতেই - উবাকা প্রতিবাদ করেসিলা বিষ্ণুপ্রিয়ায়। ঔবাকা খুমল, আঙম, মৈরাং, লুৰাঙ বারো খুৰাইরাকফামর মানু ভাষাহানল বিষ্ণুপ্রিয়া অয়া হুদাসি সময়হান। হুদালা জাতহানর পরিচয়ল অর্থাৎ ট্রাইবেল নাগৈ বর্ণহিন্দু বুলিয়া ব্রিটিশর বিরুদ্ধে থেঙ নিহান অইলইসতে মৈতেইর লগে কৌলি করানির কথা নাগৈ। তানুরতায়ৌ মণিপুরী মানে মৈতেই, মৈতেই মানে মণিপুরী এহানল পানা অয়া থানার কথা নাগৈ। গজুর কথা এহানির লগে আরাক আহান নিংশিঙে আনানি মনাউরিতাই “জাগরণ” পত্রিকার প্রথম বর্ষ অষ্টম সংখ্যাং শ্রদ্ধেয় মহেন্দ্র গিরকর “জাতীয় ভাষা সমস্যা” প্রবন্ধ উহানরে। গিরকে জাতীয় ভাষাহান বুলতে মৈতেইরে বুজাসে বারো বিষ্ণুপ্রিয়া ঠার হানরে রাংগামাটীন্ত আহেসে বৈরাঘ গোত্ররহান প্রতিপন্ন করেসে। গিরকর কথা এচুটিয়ে বিষ্ণুপ্রিয়া বুদ্ধিজীবী মহলে তোলপার সৃষ্টি করেসিল। সম্পাদক অর্জুন সিংহ গিরকে জাতহানর সেন্টিমেন্ট উহানরে প্রবন্ধহানর তলহানাত (ফুট নোটে) যৌকরে

দেসিল - “তবে কি বিষ্ণুপ্রিয়াদের পূর্বে নিজস্ব কোন ভাষা ছিল না, তাহারা কি মৈতৈইদের ভাষাতেই নিজ ভাব প্রকাশ করিত?” এ প্রশ্ন এহান মানুলীহান নাসিল। প্রশ্ন এহানে চিন্তাশীল মানুর অন্তরে খল্লী-খলক করে দেসিল। মহেন্দ্র গিরকর সাদে মানুবে পেয়া সেংকরে নুয়া করে চিন্তা করানি অকরলা। মহেন্দ্র বাবুবে নিজরে সংশোধন করিয়া ইকরল সংস্কৃত জাত বিষ্ণুপ্রিয়া ভাষা এহানে মণিপুরর আদ্যোকার বা থাইনাকার ভাষাহান। মংগোলীয় গোষ্ঠীর মৈতৈই ভাষাহান পিসেদে হমাসেগাহান। এপেইত মি যৌকরানি মনাউরিতাই গিরকে জাতহানরে, ভাষাহানরে বানাপেইতেগা বিশেষভাবে নিজে সত্যনিষ্ঠ অইতেগা নিজরে সংশোধন করেসিল। এহানাত গিরক না তলসে বরং উচ্ছল দৃষ্টান্ত আহান তুলিয়া ধরিয়া আমার পুন্নিঙে নিঙর আসন আহানাত চিরদিনরকা থা গেলগা।

মহাসভার জরম বিশেষ রাজনৈতিক পরিস্থিতি আহানর অনিবার্য ফলহান। বিষ্ণুপ্রিয়া মণিপুরীর আধুনিক ইতিহাসর পয়লাকার কাকেইহান মহাসভা হঙনির ফেলতামহান। অনেকে ধর্মর পথেদে ইলকরে দেনা মনেইতারা মহাসভার পয়লাকার কাকেইহানরে। অর্থাৎ তানু মাতানি মনেইতারাতাই রাধামাধবর য়ারিল হঙসে মহাসভা। ঔহান ইতিহাস না হংকরতেগা মাতারাহান। ইতিহাসে তানুরে সমর্থন নাকরের। ধর্মর য়ারি হমাসেগা পিসেদে আয়া। ধর্মর য়ারিল সংগঠন হঙকরানি অইলইসতে আমি মণিপুরর নিখিল হিন্দু মণিপুরী মহাসভা ঔহানাত সামিল অইলাঙইস। কারণ ধর্মর দিকেদে আমি দ্বিয়তাড অর্থাৎ মৈতৈই বারো বিষ্ণুপ্রিয়া আকতা অর্থাৎ বৈষ্ণব।

লালফামর মাধ্যমে মহাসভার জরম। যদিও সামাজিক দিবয় আহানল অর্থাৎ টেঙারার মানু না থলর ক্ষত্রিয় এ প্রশ্নল আবেগিক অয়া উঠেসিল ঔ লালফাম ঔহান। কিন্তুমান ঔহানর ঐতিহাসিক তাৎপর্য আহান আসিল। কারণ ঔ ফেলতামেঙ তঙাল জাতিসত্তা আহান হিসাবে অর্থাৎ বিষ্ণুপ্রিয়া মণিপুরী বুলিয়া পালয়া থানার রাজনৈতিক লালফামর অকরাগ দেসিল। ‘মণিপুরী’ প্রথম সংখ্যাত নিকুলেসিল ১৯৩২ ইং ১২ জুনর ‘তারাপুরে সভা’ বুলিল রিপোর্ট ঔহান পাকরলে হারপেয়ার য়েবাকা গণাঠাকুরে ‘মৈতৈই’ মানে ‘মণিপুরী’, ‘মণিপুরী’ মানে ‘মৈতৈই’ বুন্না ঔবাকা জাকারেয়া উঠলা বিষ্ণুপ্রিয়ায় কথা ঔহানর তীব্র প্রতিবাদ জানেয়া। তানুর অন্তরে ইচ্ছাদিন গাঠি বাদিয়া বলে বলে আসিল ফোড বারো দুঃখ ঔতা নিকুলিয়া আহিল। তানু ঔদিনকার সভার পঞ্চম বারো বষ্ঠ প্রস্তাবে মণিপুরীরমা “বিষ্ণুপ্রিয়া শাখার” য়ারি ইতিহাসে উল্লেখ থানা লাগের বুলিয়া বৃটিশ সরকারর দৃষ্টি আকর্ষন করানিরকা সিদ্ধান্ত নিতেগা বাধ্য করলা। মৈতৈয়ে নামনেয়াউ কথাহান হজম করলা। কারন এহানতে আর তানুর করতলে আসে রাজ্যহান নাগৈ। ব্রিটিশর শাসনে আসি ফামহান। মণিপুররমাহে নাগা বারো কুকির পাংকাম বিষ্ণুপ্রিয়ারে দাবেয়া থসিতা। এপেইন্তে ঔহান নাইতই। ঔতার গজে শিক্ষাদীক্ষায় বিষ্ণুপ্রিয়ায় আওয়েয়া আসি। বিষ্ণুপ্রিয়ায়ৌ ঔহান বগ্নেয়া সাহস করিয়া উঠেসিলা। তানু সাহস এহান পাসিলাতা ত্রিপুরার রাজা বারো বাংলাদেশর মুসলমান জমিদারর বিরুদ্ধে খাজনা নাদানিল বিদ্রোহ করিয়া। তারো সংগ্রামর মাধ্যমে শক্তি বারো সাহস দ্বিয়তাউ অর্জন করানি য়াকরের। এহান ঐতিহাসিক সত্যহান। বিষ্ণুপ্রিয়া মণিপুরীয়েউ সংগ্রামর মাধ্যমে নুবাকরে ইতিহাস লেঙকরানিত বাধ্য করেসিলা।

ঔদিনকার পবিত্র ফেলতামরে নিংশিং অয়া মহাসভা হঙনির উদ্দেশ্য বারো ঐতিহাসিক তাৎপর্যর সঠিক মূল্যায়ন অনা থকর। ○



মহাসভা লিংখাতর ক্ষেত্ৰতামে : মহাসভার লিংখাত দিবস লেপকরানি, মহাসভা
হঙনির প্রেক্ষাপট বারো ঐতিহাসিক তাৎপর্য ব্যাখ্যা বারো মূল্যায়নর পয়লাকার হৎনাহান।
লগে মহাসভা লিংখাতে যে যে দৌ গিরিগিথানিয়ে ঐতিহাসিক দায়িত্ব পালন করে
গেসিগা তানুর নিংশিঙ আহান।

দিলস লক্ষ্মীদ্র সিংহর প্রকাশিত লেবিকঃ

কাব্যগ্রন্থ :

থরো (১৯৮৬)

না কাদি তি লোগতাক (১৯৮৮)

মণি বিসারেয়া বারো কতহান কবিতা (১৯৯০)

কনাকর খৌ(শিশু কাব্য) (১৯৯৬)

খংকুল (১৯৯৬)

হুনামানুর হপন (১৯৯৭)

মালতী-রাহাল (১৯৯৮)

ইমালাম (১৯৯৯)

দিক মিলনর এলা (২০০৩)

একাংক নাটক :

এরে হে টেইপাঙ (১৯৯৭)

নিদান (২০০০)

প্রকাশ-সিঁজিলেঃ

বিষ্ণুপ্রিয়া মণিপুরী সাহিত্যর ইতিহাস

বিষ্ণুপ্রিয়া মণিপুরী পত্রিকার ইতিহাস

বিষ্ণুপ্রিয়া মণিপুরী অলংকার

বিষ্ণুপ্রিয়া মণিপুরী হৃদ